

27-July--2026

आकाशवाणी

खबरां विजय बजाज कोला,

खास-खास खबरां:-

1. सरकार म्तेहानें च गड़बड़ियें गी रोकने लेई अज्ज लोकसभा च लोक परीक्षा संशोधन विधेयक -2026 पेश करोग।
2. संसदीय मामलें दे मंत्री किरें रिजिजु होरें सब्भनं सांसदें अग्गे अपील कीती ऐ कि ओ सदन च अज्ज पेश होने आहले मतेयानें सरबन्धी तरमीमी बिल पर चर्चा च जरूर हिस्सा लैन।
3. प्रधानमंत्री नरेन्द्र मोदी होरें म्तेहानें मतल्लक सुधारें पर इक उच्ची सतह दा कार्यबल खडेरने दा ऐलान कीता ऐ। जेहदी अगुआई तकनीकें सरबन्धी खेतर दे बड्डे माहिर नंदन नीलेकणी करडन।
4. प्रधानमंत्री नरेन्द्र मोदी होरें नौजवानें गी गुजारश कीती ऐ जे ओह भारत दे बन्ने आले ग्राएं कन्नै अपना जुड़ाव होर मज़बूत करन।
5. मौसम विभाग ने अज्ज ओडीशा ते छत्तीसगढ़ च किश थाहरें पर मौलेधार बरखा दी भविक्खवाणी कीती ऐ।
6. भारत दी मीराबाई चानू ने ग्लासगो च आयोजित 2026 राष्ट्रमंडल खेड्डें च देसै लेई पैहला सुन्ने दा तगमा जिती लैता ऐ।

<><><><><><>

Parliament Bill

सरकार म्तेहानें च गड़बड़ियें गी रोकने लेई अज्ज लोकसभा च लोक परीक्षा संशोधन विधेयक -2026 पेश करोग। एह बिल 2024 बरे आले कन्नू च तरमीम लेई आहन्नेआ जा' रदा ऐ। ध्यानजोग ऐ जे जंदे शुक्रवारें केन्द्री मंत्रिमंडल ने Fast Track अदालतां कायम करने ते गड़बड़िएं आले मामलें च सख्त सजा जकीनी बनाने आले बिल दे मसौदे गी मंजूरी देई दिती ही।

<><><><><><>

Rijiju- Appeal

संसदीय मामलें दे मंत्री किरें रिजिजू होरें सब्भनैं सांसदें अगगे अपील कीती ऐ कि ओ सदन च अज्ज पेश होने आहले मतेयानें सरबंधी तरमीमी बिल पर चर्चा च जरूर हिस्सा लैन। अपने अक सोशल मीडिया पोस्ट पर रिजिजू होरें लिखेआ ऐ कि युवा पीढ़ी दी आवाज सुनने ते विद्यार्थियें दे भविक्ख लेई प्रधानमंत्री नरेन्द्र मोदी हुंदे आसेआ लैते गेदे ऐतिहासिक फैसले गी ध्यानै च रखदे होई ओ सारे सांसदें गी इस चर्चा च हिस्सा लैने दी अपील करदे न। इस विधेयक च पेपर लीक जनेए मामले कन्नै निबड़ने लेई अपराधिणं लेई सख्त सजा दी पेशकश कीती गेदी ऐ। लोकसभा दी कार्यसूचि मताबक केन्द्री मंत्री डाक्टर जितेनेद्र सिंह होर सदन च इस विधेयक गी पेश करगंन जेहदे बाद एहदे पर चर्चा शुरु कराई जाहग। इस विधेयक च 7 महत्वपूर्ण तरमीमां शामिल कीतियां गेदियां न जिंदा मकसद मजूदा बवस्था दिणं कमिणं- खामिणं गी दूर करना पूरी चाली एहदे लेई इक न्यांs बवस्था कायम करना ते अपराधिक मामले दी सुनवाई च तेजी आहन्ना ऐ तांजे ऐसे कुसै बी मामले दा जल्दी नबेड़ा होऐ ते कसूरवारें खलाफ सख्त कोला सख्त कारवाई कीती जाई सकै।

<><><><><><>

PM- Task Force

प्रधानमंत्री नरेन्द्र मोदी होरें म्तेहानें मत्तल्लक सुधारें पर इक उच्ची सतह दा कार्यबल खडेरने दा ऐलान कीता ऐ। जेहदी अगुआई तकनीकें सरबंधी खेत्तर दे इक बड्डे माहिर नंदन नीलेकणी करडन। इक वीडियो संदेश च मोदी होरें आखेआ जे एह कार्यबल म्तेहानें सरबंधी सुधारें पर ध्यान केन्द्रित करोग ते एहदी रिपोर्ट दी बिनाह उप्पर भविक्ख दे म्तेहानें दी विश्वसनीयता जकीनी बनाई जाहग। उंनैं आखेआ जे देसै दी म्तेहान-प्रणाली बड़ी भरोसेमंद ते पारदर्शी होनी चाहिदी ते एहदे लेई तकनीकें दा बदोबद इस्तेमाल कीता जाना लोड़चदा ऐ। इस कार्यबल च खूफिया ब्यूरो दे साबका डरेक्टर तपन डेका, इसरो दे साबका अध्यक्ष एस. सोमनाथ ते IIT चेन्नेई दे डरेक्टर वी. कामकोटी बी शामिल होडन। एहदे इलावा शिक्षा मंत्रालय दियां साबका सचिव अनीता कारवाल ते प्रबंध विशेषज्ञ अमृत लाल मीना बी कार्यबल दा हिस्सा न। प्रधानमंत्री होरें आखेआ ऐ जे सरकार अज्ज संसद च म्तेहानें कन्नै सरबन्धत सख्त कनूनी प्रावधानें आला इक नमां विधेयक पेश करोग। श्री मोदी होरें करोड़ां -बददे विद्यार्थियें दे भविक्ख गी सुरक्षित रखने लेई सरकार दी वचनबद्धता पर बी जोर दिता।

<><><><><><>

PM-VB Villages

प्रधानमंत्री नरेन्द्र मोदी होरें नौजवानें गी गुजारश कीती ऐ जे ओह भारत दे बन्ने आले ग्राएं कन्नै अपना जुड़ाव होर मजबूत करन। श्री मोदी होरें वीडियो कांफ्रेंस दे माध्यम कन्नै विकसित वाईब्रेंट विलेज प्रोग्राम दे प्रतिभागिं गी सम्बोधित करदे होई विकसित ग्राएं गी विकसित भारत दी नीह करार दिता। प्रधानमंत्री होरें “मेरा युवा भारत” मंच दे माध्यम कन्नै राष्ट्र निर्माण च युवाएं दी बधदी भूमिका दी सराहना कीती। उ’नें आखेआ जे देसै दे युवा नां छड़ा विकसित भारत दी प्रेरणा-ताकत न, सगुआं एहदे सबनें शा बड़्डे लाभार्थी बी हैन। श्री मोदी होरें आखेआ जे जिसलै युवाएं दी ऊर्जा गी राष्ट्री चुनौतिं दा सामना करने ते संसाधन तुप्पने च लाया जंदा ऐ तां देसै दा भविष्य उज्जवल होंदा ऐ। “विकसित वाईब्रेंट विलेज” प्रोग्राम दे सरबंध्य च प्रधानमंत्री होरें आखेआ जे इस पैहल दा मकसद युवाएं गी देसै दे बन्ने आले ग्राएं दा दौरा करने, उनें गी समझने ते उन्दे कन्नै जुड़ने लेई प्रेरित करना ऐ।

<><><><><><>

Germany Attack

जर्मनी च बर्लिन प्राइट फेस्टविल च होए दे इक घातक आतंकी हमले दे संदिग्ध गी पुलसै शैहर दे बाहरले इलाके च मारी दिता ऐ। इस हमले च इक जनें दी मौत होई गई ही ते 29 दुए घाऽल होई गे हे। मारे गेदे संदिग्ध दी पंछान अब्दुल बल्लौत दे रुपै च कीती गई ऐ जेहड़ा लेबनानी मूल दा इक जर्मन बसनीक ऐ। बर्लिन शैहरा दे इक प्रमुख इलाके च होए दे इस हमले दे बाद 24 घंटे दे अंदर-अंदर इस आदमी गी ढेर करी दिता गेआ ऐ। बर्लिन दे वकीलें दा आखना ऐ कि संदिग्ध नै किश चिर पैहले आतंकी इस्लामिक स्टेट समूह ISIS च शामिल होने दी बी कोशश कीती ऐ। जर्मनी दे गृहमंत्री अलेक्जेंडर डोब्रिंइट होरें एहदे शा पैहले प्राइट फेस्टिवल दे दौरान किश लोकें पर गड्डी चाढ़ने ते चाकू कन्नै मारने दी घटना गी संदिग्ध आतंकी हमला दस्सेआ हा। एह हमला शनिवार चिरे रातीं फेस्टिवल दे समापन समारोह दौरान होआ जित्थे एह आदमी अपनी गड्डी लेइयै भीड़ पर आई चढ़ेआ ते फही इक बड़्डे छुरे कन्नै अन्नेवाह लोकें पर हमला करन लगगा।

<><><><><><>

Weather

मौसम विभाग ने अज्ज ओडीशा ते छत्तीसगढ़ च किश थाहरें पर मौलेधार बरखा दी भविक्खवाणी कीती ऐ पूर्वी उत्तर प्रदेश/पच्छिम बंगाल दे गंगा कन्नै लग्गदे इलाकें/ कौंकण/ गोवा/ मध्य महाराष्ट्र ते उत्तराखंड दिएं किश थाहरें पर बी मौलेधार बरखा बरने दे असार न। एहदे इलावा अरुणाचल प्रदेश/ असम/ मेघालय/ नागालैंड/ मणिपुर/मिज़ोरम ते त्रिपुरा दिएं किश थाहरें पर बी अज्ज तेज बरखा बरी सकदी ऐ। इस्सै चाल्ती दी स्थिति आंध्र-प्रदेश ते कर्नाटक दे समुन्द्री कंडे आले इलाकें, पूर्वी मध्य प्रदेश/ गुजरात/ हरियाणा/ चंडीगढ़/ दिल्ली/ हिमाचल प्रदेश/ झारखंड/ केरल/ माहे/ पंजाब/ विदर्भ ते पच्छमी उत्तर-प्रदेश च बी बनी दी रेही सकदी ऐ।

<><><><><><>

Common Wealth

भारत दी मीराबाई चानू ने ग्लासगो च आयोजित 2026 राष्ट्रमंडल खेड्डें च देसै लेई पैहला सुन्ने दा तगमा जित्ती लैता ऐ। उ'नें महिलाएं दे 48 किलोग्राम वर्ग च 190 किलोग्राम दा रिकार्ड भार तुलकियै बड़ा गै शानदार प्रदर्शन कीता ऐ। 31एं बरे दी मीराबाई ने Snatch 85 किलोग्राम ते Clean & Jerk च 105 किलोग्राम भार चुक्कियै राष्ट्रमंडल खेड्डें दे नमें रिकार्ड बनाए। इस जित दे कन्नै गै उ'नें 2018 ते 2022 च सुन्ने दे तमगे जितने दे बाद लगातार त्रीऽ बारी राष्ट्रमंडल खेड्डें च सुन्ने दा तगमा हासल कीता ऐ। राष्ट्रपति द्रौपदी मुर्मू, उपराष्ट्रपति सी.पी. राधाकृष्णन ते प्रधानमंत्री नरेन्द्र मोदी होरें मीराबाई चानू होरेंगी उन्दी इस उपलब्धि पर बधाई दिती ऐ। उ'नें आखेआ जे मीराबाई चानू होरें असाधारण दलेरी, पक्के-निश्चे ते उत्कृष्टता दा प्रदर्शन कीता ऐ। भारत ने भार तुलकने दे मुकाबले च 2 चांदी दे तगमे बी जिते न।

<><><><><><>

Cricket

मर्दे दे क्रिकेट च भारत नै कल हरारे च खेड्डे गेदे मजूदा श्रृंखला दे त्रीए ते खीरी टी-20 अंतराष्ट्रीय मैच च मेजबान जिम्बावे गी 35 रन्ज कन्नै रहाइयै श्रृंखला 3-0 कन्नै जित्ती लैती ऐ। जिम्बाब्वे दी टीम भारत आसेआ तैह 193 रन्ज दे लक्ष दा पिच्छा करदे होई 20एं ओवरें च 7 विकेटां मोहाइयै 157 रन्ज गै बनाई सकी। भारत दी तरफा मयंक यादव नै त्रै ते यश ठाकुर नै 2 विकेट हासल कीते। पैहले बल्लेबाजी करदे होई भारत ने 20 ओवरें च 5 विकेटें पर 192 रन्ज बनाए। वैभवन

सूर्यवंशी नै शानदार बल्लेबाजी करदे होई 49 गेंदे च 81 रन्ज बनाए जिसले के इशान किशन नै 26 गेंदे च 29 रन्ज दा योगदान दिता। जिम्बाब्वे दी तरफा ब्रैंड इवांस ने 2 विकेटां लैतियां। इस जित दे कन्नै गै भारत नै ICC टी-20 अंतराष्ट्रीय रैंकिंग च पैहली थाहर परतियै हासल करी लैती ऐ।

<><><><><><>